
ASKATASUNA

Ikastoletako umeentzat (eta andientzat) antzerki-
txoa.

Antzezlariak: edeslaria eta txakur bi: Petrukin
eta Petrukan.

Petrukan txakur lodi-lodia maai batean jarrita ja-
ten agertuko da. Aurrean platerak eta ontziak jate-
koz bete-beterik... baiña samatik kateaz lotuta.

Petrukin, ostera, makal, mee, goseti, an eta emen
zer eroango agora usainka...

Edeslaria:

Gure txakurrak, txakur bi dira, bi:
Petrukin argal, eta Petrukan lodi.
Petrukin, ikusten dozue,
zimela da, mustur luze,
agin zorrotzak eta txankak mee.
Jaio zanetik onek, ez dot uste,
iñoz dauanik esterik bete.
Petrukan, ostera, tripandi da,
lepoa lodia dauka,
bizkarra bigun, ulea legun.
Oneri ez yako faltako,
lukainka, saltza gozo eta oillazko
beti ugari jateko.

Petrukan eta Petrukin

Petrukan:

Kaixo, Petrukin,
an eta emen bazterrak aztertzen,
zertan abil?

Petrukin:

Nire gosea ezin yoat il!!!

Petrukan:

Ba... nik ezebe ez yaukat eskas:
bildots errea, txarriki, kazulakadaz.

Petrukin:

Zelan, arraio, Petrukan, i konpontzen az?

Petrukan:

Jarri adi, Petrukin, aberats batekin,
eta aren menpean
biziko az bakean, etxeko atean,
lanik egin barik,
eguskia artzen egun guztian.
Bizitzeko eukiko dok txabola,
to egiteko oe bigun, epela.
Zergatik, Petrukin, bizi orrela?
I be bizi aiteke ni bezela!!!

Petrukin:

Ondo bizi az benetan,
nire lagun, Petrukan...
Baiña... zer daukat, or dilindan,
ire saman, Petrukan?

Petrukan:

Au dok urrezko kate eder, fiña,
nire jabeak niretzat egiña.

Petrukin:

Ez yoat nik, txotxo,
ez yoat nik gura katerik
ez diamante, ezta urrezkorik.
I or ago lodi,
baiña lotuta.
Nik milla bider gurago yoat
gosez bizi baiña askatuta.

Edeslariak:

Askatasuna zein eder dan
txakurrak ba daki.
Gure artean oraindik askok
ez geiegi.
Bearrezko dau gizonak jana,
baita etxe ta bizibide ona.
Baiña gauzarik eder-ederrena
gizon danentzat: ASKATASUNA.

GOIKOETXEA'TAR IÑAKI